

REAGOVANJE

Obzirom da je načelnik opštine Goražde Muhamed Ramović, po ko zna koji put, iskoristio kratku pauzu između brojnih bjelosvjetskih putovanja da napadne Bosansko-podrinjski kanton Goražde i druge kantonalne institucije, i to uvijek iz jednog jedinog razloga - što poštuju zakone i rade u interesu građana, i sve to koristi kao prljavu predizbornu kampanju, želimo građane opštine Goražde upoznati sa nekim činjenicama zbog kojih je u velikoj mjeri usporen pozitivan trend razvoja Goražda i kantona u cjelini:

- Kad smo započeli aktivnosti na izgradnji Zgrade za mlade, načelnik Ramović je rekao: „nema od toga ništa to je samo predizborna kampanja „crvenih“,
- Kad smo uputili Javni poziv za prikupljanje zahtjeva za prodaju stanova za mlade, veliki broj njih je odustao zato što su im u Opštini Goražde rekli: „nemojte džaba trošiti pare nema od toga ništa, to je samo predizborna kampanja“,
- Kad smo upozorili Opštinu Goražde da je istekao zakonom predviđeni rok za korištenje privremene deponije u Šišetima, kao i na opasnost od širenja zaraze izazvane blizinom deponije centru grada pred nadolazeće ljetne dane, po tom pitanju nije poduzeto ništa,
- Kad smo uputili pismo namjere za kupovinu zemljišta za izgradnju stambeno-poslovnog objekta koji bi se gradilo u skladu sa Zakonom o javno-privatnom partnerstvu, nije se udostojio ni da odgovori, tako da se objekat još ne gradi,
- Kad smo uputili pismo namjere za kupovinu zemljišta u svrhu izgradnje stambeno-poslovnog objekta za boračku populaciju, nije se udostojio niti da odgovori tako da se zgrada za stambeno nezbrinute porodice iz reda boračke populacije ne gradi,
- Kad smo uputili pismo namjere da kupimo zemljište za izgradnju zgrade sa obdaništem u Vitkovićima prvenstveno namijenjene za uposlenike industrijske zone „Vitkovići“, paralelno s tim načelnik vodi aktivnosti na dogradnji privremenog objekta na lokaciji izgradnje tog objekta, što je suprotno prostorno-planskom rješenju iz Regulacionog plana naselja Vitkovići pa se ni u ovom slučaju nije udostojio ni da odgovori, iako je na sve podnesene zahtjeve bio dužan odgovoriti u zakonom predviđenom roku,
- Kad smo tražili da izvršimo dogradnju i opremanje 79 potkrovnih stanova u ul. M. Tita, nije dozvolio, već ih suprotno svim zakonima izdaje pod kiriju,
- Kada je Skupština BPK-a Goražde te stanove proglasila imovinom kantona, ignorisao je odluku najvećeg zakonodavnog tijela kantona i nastavio sa nezakonitim aktivnostima.

I dok Bosansko-podrinjski kanton Goražde ugovara asfaltiranje ulica u gradu Goraždu, načelnik se sprema na službeno putovanje na neku atraktivnu destinaciju iz koje nikad, do dana današnjeg, nije došao niti jedan investitor spreman da ulaže u razvoj Goražda i otvaranje novih radnih mjesta.